

**ЎЗБЕКИСТОН РЕСПУБЛИКАСИ НОМИДАН  
ҲАЛ ҚИЛУВ ҚАРОРИ****Ромитан тумани****2023 йил 25 декабрь**

Ромитан туманлараро иқтисодий судининг судьяси Н.Т.Зоиров раислигида, судья ёрдамчиси Н.Рашидовнинг котиблигида, аризачи – Ромитан туман давлат солиқ инспекциясининг, жавобгар "ХХХ" масъулияти чекланган жамиятига нисбатан банклардаги ҳисобварақлар бўйича операцияларни ўн кундан кўп муддатга тўхтатиш тўғрисидаги аризаси бўйича кўзғатилган иқтисодий ишни Ромитан туманлараро иқтисодий суди биносида очик суд мажлисида кўриб чиқиб, қуйидагиларни

**аниқлади:**

иш ҳужжатларидан кўринишича, жавобгар "ХХХ" масъулияти чекланган жамияти (кейинги ўринларда матнда “жавобгар” деб юритилади) солиқ органига 2023 йил октябрь ойи учун айланмадан олинадиган солиқ бўйича ҳисоботини белгиланган муддатда солиқ органига топширилмаган. Шу сабабли Ромитан туман давлат солиқ инспекцияси (кейинги ўринларда матнда “аризачи” деб юритилади)нинг қарори билан жавобгарнинг ҳисобварақлари бўйича барча чиқим операциялари ўн кунга тўхтатилган. Жавобгар томонидан ҳисоботлар тақдим этилмаганлиги сабабли аризачи иқтисодий судга ариза билан мурожаат қилиб, ҳисобварақлари бўйича операцияларни ўн кундан кўп муддатга тўхтатиб туриш сўраган.

Аризачи ва жавобгар суд мажлиси вақти ва жойи тўғрисида лозим даражада хабардор қилинган бўлсада, суд мажлисида вакил иштирокини таъминламади. Жавобгар ариза юзасидан ўз эътирозларини судга тақдим қилмади. Бироқ, аризачи судга ҳуқуқбузарлик ҳолати бўйича маълумотномани тақдим қилган.

Ўзбекистон Республикаси Иқтисодий процессуал кодекси (бундан буён матнда “ИПК” деб юритилади) 220-моддасининг биринчи қисмига кўра суд ишда иштирок этувчи шахсларни суд мажлисининг вақти ва жойи тўғрисида ушбу кодексда белгиланган тартибда хабардор қилади. Бунда суд аризачининг зиммасига жавобгарни суд мажлисининг вақти ва жойи тўғрисида хабардор қилиш мажбуриятини юклашга ҳақли. Суд мажлисининг вақти ва жойи тўғрисида тегишли тарзда хабардор қилинган мазкур шахсларнинг келмаганлиги, агар суд уларнинг келишини мажбурий деб топмаган бўлса, ишни кўриб чиқиш учун тўсқинлик қилмайди.

Суд, ушбу қонун нормасига асосланиб, иқтисодий ишни аризачи ва жавобгар вакилининг иштирокисиз кўриб чиқишни ҳамда иш ҳужжатларини ўрганиб қуйидаги асосларга кўра, аризачининг аризасини қаноатлантиришни лозим топади.

Иш ҳужжатларидан кўринишича, Ўзбекистон Республикаси Солиқ кодекси (кейинги ўринларда матнда “СК” деб юритилади) 273-моддасининг биринчи қисмига асосан солиқ тўловчилар, солиқ ҳисоботини ўзлари солиқ ҳисобида турган жойдаги солиқ органларига ўтган солиқ даврдан кейинги ойнанинг йигирманчи кундан кечиктирилмаган муддатда тақдим этишлари лозимлиги белгилаб қўйилган бўлсада, жавобгар томонидан 2023 йил октябрь ойи учун айланмадан олинадиган солиқ бўйича ҳисоботини белгиланган муддатда солиқ органига топширилмаган.

СК 82-моддасининг биринчи қисмига кўра солиқ ҳисоботи солиқ тўловчи ҳисобга олинган жойдаги солиқ органига белгиланган шаклда қоғоз ёки электрон шаклда ушбу Кодексга мувофиқ солиқ ҳисоботига илова қилиниши лозим бўлган ҳужжатлар билан бирга тақдим этилади.

СК 111-моддасининг биринчи ва учинчи қисмларига кўра, солиқ тўловчининг (солиқ агентининг) банкдаги ҳисобварақлари бўйича операцияларни тўхтатиб туриш



тўғрисидаги қарор солиқ органининг раҳбари (раҳбар ўринбосари) томонидан ўн кундан кўп бўлмаган муддатга қабул қилиниши мумкин. Солиқ тўловчининг (солиқ агентининг) банкдаги ҳисобварақлари бўйича операцияларни ўн кундан кўп муддатга тўхтатиб туриш тўғрисидаги қарор солиқ органининг илтимосномасига асосан суд томонидан қабул қилиниши мумкин. Бунда солиқ тўловчининг (солиқ агентининг) банк ҳисобварақлари бўйича операциялари суд томонидан қарор қабул қилингунга қадар тўхтатиб турилади.

Юридик шахслар ва яқка тартибдаги тадбиркорларнинг банкдаги ҳисобварақлари бўйича операцияларни тўхтатиб туриш солиқ органи томонидан мазкур солиқ тўловчиларнинг (солиқ агентларининг) солиқ мажбуриятлари бажарилишини таъминлаш учун ушбу солиқ тўловчи (солиқ агенти) томонидан солиқ органига молиявий ва (ёки) солиқ ҳисоботи бундай ҳисоботни тақдим этишнинг белгиланган муддати тугаганидан кейин ўн кун ичида тақдим этилмаганда қўлланилади.

Суд, жавобгар томонидан 2023 йил октябрь ойи учун айланмадан олинадиган солиқ бўйича солиқ ҳисоботини белгиланган муддатда ҳисобот солиқ органига топширилмаганлигини, солиқ органи томонидан юборилган хабарнома жавобсиз қолдирилганлиги сабабли арз қилинган талабни қаноатлантиришни лозим топди.

“Давлат божи тўғрисида”ги Ўзбекистон Республикаси Қонуни 9-моддаси биринчи қисмининг 19-бандига кўра ариза ва жавобгар — ҳуқуқий таъсир чораларини қўллаш тўғрисидаги ишлар бўйича иқтисодий судларда давлат божи тўлашдан озод қилинганлигини инобатга олишни лозим топди.

Ўзбекистон Республикаси Солиқ кодексининг 111-моддаси, Иқтисодий процессуал кодексининг 176, 222-моддаларини қўллаб суд,

#### **қарор қилди:**

Арз қилинган талаб қаноатлантирилсин.

Жавобгар "XXX" масъулияти чекланган жамиятининг банклардаги барча ҳисобварақлари бўйича барча чиқим операциялар (фуқаролик қонун ҳужжатларига мувофиқ биринчи навбатда кўрсатилган тўловларга, шунингдек қонун ҳужжатларига мувофиқ ундирувга йўл қўйилмайдиган банклардаги ҳисобварақлар бундан мустасно) Ўзбекистон Республикаси Солиқ кодексининг 111-моддасининг биринчи қисмига асосан жавобгар 2023 йил октябрь ойи учун айланмадан олинадиган солиқ бўйича солиқ ҳисоботини тақдим этилгунга қадар тўхтатиб турилсин.

Ҳисобварақлар бўйича операцияларни тўхтатиб туришга сабаб бўлган ҳолатлар жавобгар "XXX" масъулияти чекланган жамияти томонидан тўлиқ бартараф этилгандан сўнг, давлат солиқ хизмати органининг тақдим этиладиган ёзма кўрсатма (қарор) асосида хизмат кўрсатувчи банк томонидан ҳисобварақлар бўйича операциялар тиклансин.

Жавобгар "XXX" масъулияти чекланган жамияти ҳисобидан суднинг ҳисобига 34.000 сўм почта ҳаражати ундирилсин.

Ҳал қилув қарори қонуний кучга киргач бу ҳақда ижро варақаси берилсин.

Мазкур ҳал қилув қароридан норози тараф шу суд орқали ўн кунлик муддат ичида Бухоро вилоят судига апелляция шикоят (протест) бериши мумкин.

**Судья**

**Н.Зоиров**

